

LEMBAGA URUS AIR SELANGOR
(UNIT KORPORAT)

AKHBAR : SINAR HARIAN

TARIKH : 09 SEPTEMBER 2020

KERATAN AKHBAR

Sultan Selangor dukacita isu air

Titah robohkan rumah, kilang yang beroperasi secara haram dan mencemarkan sungai di Selangor

Oleh MOHD IZZATUL IZUAN TAHIR

SHAH ALAM

Sultan Selangor, Sultan Sharafuddin Idris Shah mengutus surat kepada Menteri Besar Selangor, Datuk Seri Amirudin Shari bagi menzahirkan rasa dukacita baginda terhadap impak yang terpaksa ditanggung rakyat negeri itu akibat pencemaran sungai.

Menerusi kenyataan yang dimuat naik di Facebook, Selangor Royal Office memaklumkan bahawa antara intipati surat Sultan Sharafuddin itu ialah baginda mahu tindakan penguatkuasaan lebih tegas diambil termasuk merobohkan rumah dan kilang terutama yang beroperasi secara haram dan berpotensi mencemarkan anak-anak sungai dan sungai di Selangor.

"Baginda tidak berkenan adanya unsur campur tangan politik dalam penguatkuasaan isu-isu berkaitan alam sekitar dan pencemaran air sungai.



Sultan Sharafuddin berkenan menerima menghadap Amirudin (kiri) di Istana Bukit Kayangan, Shah Alam semalam berhubung masalah bekalan air bersih di Selangor yang terus berulang.

"Baginda telah lama menitahkan supaya sebuah jawatankuasa khas ditubuhkan kerajaan Selangor untuk memantau dan memastikan air sungai tidak dicemari dengan bahan kimia atau sampah sarap sehingga boleh menjejaskan bekalan air mentah kepada loji-loji rawatan air," kata kenyataan itu di sini semalam.

Selain itu, kenyataan tersebut memaklumkan Sultan Sharafuddin mahu undang-undang lebih tegas dilaksanakan dengan segera ke atas pelaku-pelaku yang menyebabkan pencemaran sungai.

"Penalti yang lebih berat wajar dikenakan kepada mereka yang mencemarkan alam sekitar khususnya sumber air. Mereka yang terbukti melakukan kesalahan hendaklah dijatuhkan hukuman penjara mandatori serta dikenakan denda yang maksimum.

"Baginda khuatir sekiranya masalah air ini berterusan, rakyat jelata akan memberontak dan boleh mengakibatkan ketegangan dan seterusnya akan menjejaskan keharmonian sosial," kata kenyataan itu lagi.

Kes pencemaran sungai diperincikan kepada Peguam Negara

SHAH ALAM - Kerajaan Selangor akan berhubung dengan Jabatan Peguam Negara untuk memperinci serta mengemaskini pelaporan berkenaan insiden pencemaran sungai di Selangor termasuk kes terbaharu minggu lalu.

Menteri Besar Selangor, Datuk Seri Amirudin Shari berkata, kerajaan negeri berharap tindakan tegas segera dilakukan bagi menyelesaikan masalah pencemaran sungai.

"Kerjasama yang rapat antara semua agensi terutama antara kerajaan Persekutuan dan kerajaan negeri amat penting demi memastikan keselamatan bekalan air negeri terjamin," katanya dalam satu kenyataan di sini semalam.

Amirudin berkata, kerajaan negeri juga mengucapkan terima kasih serta mengambil maklum atas tindakan segera Jabatan Peguam Negara kelmarin.

"Pagi ini (semalam) saya sudah bertemu dengan Penasihat Undang-undang Kerajaan Selangor, Datuk Salim Soin; Pengarah Lembaga Urus Air Selangor (LUAS), Datuk Ir Hashim Osman dan Pengarah Jabatan Alam Sekitar (JAS) Selangor, Nor Aziah Jaafar," katanya.

UNIT KORPORAT

TINGKAT 13, BANGUNAN DARUL EHSAN,
NO.3, JALAN INDAH, SEKSYEN 14, 40000 SHAH ALAM
TELEFON:03-55111800 / FAX:03-55101800

LEMBAGA URUS AIR SELANGOR
(UNIT KORPORAT)

17 individu saman syarikat cemari Sungai Gong

SHAH ALAM - Seramai 17 individu memfailkan tuntutan saman di Mahkamah Shah Alam semalam terhadap syarikat yang bertanggungjawab menyebabkan pencemaran di Sungai Gong, Selangor sehingga 1.2 juta rakyat menghadapi masalah ketiadaan bekalan air. Peguam mewakili semua

plantif, Mohd Khairul Azam Abdul Aziz berkata, saman berkenaan difailkan secara e-filing di mahkamah berkenaan pada jam 1.52 petang semalam.

Menurutnya, saman itu difailkan terhadap syarikat Yip Chee Seng & Sons Sdn Bhd selaku defendan bagi menuntut

ganti rugi dan juga berdasarkan laporan media-berhubung masalah itu yang melibatkan masalah kepada pelbagai pihak.

"Defendan adalah dengan jelas, nyata dan terang merupakan pihak bertanggungjawab secara langsung terhadap semua kerosakan dan kecelakaan terbabit.

"Ini secara jelas dikenal pasti merujuk kepada siaran media bertarikh 3 September 2020 jam 7 malam apabila melalui siasatan dilakukan dan kenyataan media yang dibuat Lembaga Urus Air Selangor (LUAS)," katanya kepada pemberita di lobi Mahkamah Shah Alam di sini semalam.

SPRM siasat kes
cemar Sungai Gong

PUTRAJAYA - Suruhanjaya Pencegahan Rasuah Malaysia (SPRM) sudah memulakan siasatan dalam kes pencemaran Sungai Gong, Rawang, Selangor bagi meneliti jika wujud unsur rasuah melibatkan mana-mana pihak termasuk agensi penguat kuasa.

SPRM dalam satu kenyataan memaklumkan, pihaknya meminta orang ramai yang mempunyai maklumat berkaitan isu berkenaan untuk tampil memberi kerjasama.

"Siasatan telah mula dijalankan untuk meneliti unsur rasuah membabitkan pihak berkuasa berkaitan isu terbabit.

"Sekiranya masyarakat ada sebarang maklumat, boleh tampil dan bagi kerjasama dengan kami," kata kenyataan itu di sini semalam.



Abu Backer (kiri) menyerahkan notis tuntutan kepada Shahniza di pejabat Air Selangor di Kuala Lumpur semalam.

NGO tuntutan Air Selangor bayar ganti rugi RM1,000

KUALA LUMPUR - Pertubuhan Pejuang Perlembagaan dan Rukun Negara Malaysia menerusi syarikat guaman Tutuan AB Sidek and Co semalam membuat tuntutan ganti rugi ke atas pengurusan Air Selangor Sdn Bhd (Air Selangor).

Tuntutan itu bagi mewakili sebahagian penduduk dan syarikat di Selangor dan Kuala Lumpur yang terjejas berikutan gangguan bekalan air bermula pada 6 September sehingga semalam.

Pengerusi pertubuhan bukan kerajaan (NGO) itu, Datuk Abu Backer Sidek berkata, notis tuntutan diserahkan kepada wakil Air Selangor, Shahniza Anom di pejabat syarikat itu.

Menurutnya, antara tuntutan yang dibuat ialah memohon bayaran ganti rugi sebanyak RM1,000 dengan mengkreditkan akaun tersebut ke dalam akaun setiap pemilik akaun yang terkesan.

"Ramai individu tampil menyuarakan rasa tidak puas hati dan meminta supaya tuntutan ganti rugi dibuat memandangkan mereka mengalami kesusahan.

"Ada antaranya yang terpaksa mengeluarkan belanja khususnya terpaksa menginap di hotel atau keluar dari Selangor dan Kuala Lumpur untuk mendapatkan air yang bersih," katanya kepada pemberita selepas menyerahkan notis tuntutan berkenaan di sini semalam.

UNIT KORPORAT

TINGKAT 13, BANGUNAN DARUL EHSAN,
NO.3, JALAN INDAH, SEKSYEN 14, 40000 SHAH ALAM
TELEFON:03-55111800 / FAX:03-55101800